

William Marrion Branham

Motindami

Kasi na mikolo ya mongongo ya mwanje na nsambo...

Emoniseli 10:7

MOLONGO YA MIKANDA

1 MOSAKOLI?

5 ELAKA YA MOSAKOLI NA
MIKOLO YA SUKA

9 EBANDELI

12 MIBU YA BOLENGE

24 LIKONZI NA MÓTO

30 MABOMBAMI EMONISAMI

34 BISIKA EKOMAMI

La Voix de Dieu ezali mosala oyo eponi ebongiseli te pe emipesi mpo Nsango Malamu ya Nkolo Yesu Klisto ékende liboso. Libondeli na biso ezali ete buku moke oyo ézala lipamboli mpo na yo pe épesa yo lisosoli ya malamumu koleka ya ntango na suka oyo tozali kobika na yango.

MOSAKOLI?

Kati na Biblia, Nzambe apesaka ntango nyonso Nsango na Ye epai na bato ya mokili na nzela ya mosakoli ya eleko. Asololaki na Mose na nzela ya nzete ya kopela móto pe Apesaki ye etíndá ya kobimisa Baebele libanda na Ezipito. Likonzi na Móto na polele ná bilembo mosusu epesamelaki ye mpo na kotatola mosala na ye. Yoane Mobatisi ayaki na Nsango oyo elengelaki mokili mpo na boyei ya Masiya. Ezalaki ye kobatisa Nkolo Yesu na Ebale ya Yolodani, Mongongo uta na Likolo etatolaki etíndá ya Yoane ya kotalisa Mwana-Mpate ya Nzambe: “Oyo azali Mwana na ngai ya bolingo, oyo nasepeli na ye mingi.” Na mibu elandaki, Mongongo na Nkolo eyokamaki lisusu ntango Asololaki na mosakoli moko, ntango Asololaki na Polo na nzela ya Pole ebomaka miso, pe na sima, epesaki ye etíndá ya kotia mangomba na molongo. Kati na Kondimana ya Sika pe ya Kala, Nzambe alobelaka bato na Ye na nzela na mabongisi ya bibongiseli to mabongisi ya basambeli ata moke te. Alobelaka bato ntango nyonso na nzela ya moto moko: mosakoli na Ye. Pe Atatolaka basakoli yango na nzela ya bilembo ya kokamwa.

Kasi ezali ndenge nini lelo? Nzambe azali kokoba komonisa Liloba na Ye na basakoli? Bilembo ya kokamwa ezali kokoba kino lelo? Nzambe akotinda nde mosakoli ya eleko oyo kati na mokili? Eyano ezali mpenza polele:

“Iyo!”

Kasi tokoyeba ndenge nini ntango mosakoli akoya? Akozala na lolenge nini? Akosala misala nini? Akopesa biso elembo nini? Akokokisa Makomi nini?

Basakoli ya kala bazalaki bato ya mpiko ya Nzambe, pe bazalaki kobanga te kotelemela bibongiseli ya basambeli. Na ntembe te, bakambi ya mangomba bazalaki ntango nyonso kotiola bango mpenza. Eliya abetaki m'ondengé na bibongiseli ya basambeli ya eleko na ye, atunaki bango soki Nzambe akoyamba mbeka na bango, to ya ye. Bagángaki. Basakolaki. Bapumbwaki likolo na etumbelo. Bamizokisaki bampota na bambeli. Kasi Nzambe ayokaki bango te. Eliya atombolaki miso na Likolo pe alobaki: "Tika éyebana lelo ete ozali Nzambe na Yisalaele, pe ngai nazali mosali na yo, pe nasali makambo oyo nyonso kokokana na liloba na yo." Na sima, abengaki móto ékita longwa na Likolo mpo étumba mbeka. Mosakoli Mika atelemelaki Mokonzi ya Yisalaele, ná banganganzambe nyonso, ntango apamelaki Nganganzambe Mokonzi Zidikiya mpo asakolaki lokuta. Nganganzambe Mokonzi abetaki ye na elongi pe Mokonzi abwakaki ye na boloko mpo alobaki solo. Ata Nkolo Yesu, bibongiseli ya basambeli ya eleko na Ye bayinaki Ye mingi kino babákaki Ye na ekulusu elongo na babomi bato ya mabe koleka. Soki masolo ya kala elobi solo, bibongiseli ya mikolo oyo bakoyina mosakoli, pe bakobenga ye mopéngwisi, mosakoli ya lokuta, to moto mabe koleka. Kasi Nzambe akozala ngambo ya mosali na Ye.

Soki mosakoli moko azalaki na eleko oyo, alingaki koyambama ndenge nini na Lingomba Katoliko? Na Lingomba Batiste? Na Lingomba Luterien? Na bibongiseli nyonso?

Nkolo Yesu alobaki na baoyo nyonso bandimeli Ye: *"Bilembo oyo ekozala na baoyo bakondima; na nkombo na ngai, bakobengana milimo mabe, bakoloba minoko ya sika, Bakolokota banyoka, pe soki bameli eloko oyo ebomaka, ekosala bango mabe te; bakotiela babeli*

maboko, pe bakobika.” (Malako 16:17-18). Likomi oyo ezali solo lelo? Soki ezali solo te, mokolo nini Maloba ya Nkolo esilaki ngala? Na Biblia mobimba, basakoli bazalaki kobikisa babeli, kobengana milimo mabe, pe kosala bikamwa. Mose atelemisaki nyoka ya motáko liboso na libota ya Yisalaele mpo bábikisama soki nyoka ya ngenge eswi bango (Mituya 21:9). Naamane, Mosúlya ya nguya, ayaki epai na Elisa mpo ábikisama na mába (II Mikonzi 5:9). Ntango elenge mobali moko akweaki longwa na lininísa ya ndako ya etáje pe akufaki, ntoma Polo azingaki ye na maboko pe azongisaki bomoi kati na ebembe (Misala 20:10). Tozali bobele na makambo oyo ekomami kati na mibu misato na ndambo ya bomoi ya Nkolo na biso Yesu, kasi kati na mibu yango mpenza, Azalaki ntango nyonso kobikisa babeli. Bakufi miso bazalaki komona. Bato na mába bazalaki kobika. Bakufi matoi bazalaki koyoka. Bibosono bazalaki kotambola. Bokono ya lolenge nyonso ezalaki kobikisama (Matai 4:23).

Libanda na lobiko ya nzoto, Nzambe azalaki pe kotatola basakoli na Ye na lolenge mosusu. Ata basekelé oyo ebómbámá na nse ya motema mpenza ezalaki kotalisama na bato yango ya Nzambe. Mokonzi Nebukadenezare alotaki ndoto moko oyo etungisaki ye, kasi abosanaki yango. Mosakoli Daniele ayebisaki mokonzi ndoto yango pe lisakoli oyo elandaki (Daniel 2:28). Eloko moko te ebombamelaki Salomo ntango Mokonzi-mwasi ya Seba ayaki liboso na ye. Atondisamaki mpenza na Molimo na lolenge ete ayebisaki ye mituna ya motema na ye *liboso* na ye kotuna yango (I Mikonzi 10:3). Elisa ayebisaki Mokonzi ya Yisalaele miango nyonso ya Mokonzi ya Súlya, ata maloba ya nkukú oyo alobaki na ndako na ye ya kolala (II Mikonzi 6:12).

Na misala na Ye moko, mbala mingi, Nkolo Yesu azalaki kotalisa ete Molimo oyo ya kososola makanisi ezali Molimo ya Klisto. Asosolaki lolenge ya Natanaele ntango Alobaki: “Tala Moyisalaele mpenza, oyo azali na bokosi te!” Pe Yesu akobaki koyebisa Natanaele esika azalaki ntango Filipo asololaki na ye na ntina na Masiya (Yoane 1:48). Ntango Natanaele amonaki ete Yesu ayebaki motema na ye, andimaki mbala moko ete Azali Klisto. Mbala ya liboso Yesu amonaki Petelo, Ayebisaki ye nkombo ya tata na ye, Yona (Yoane 1:42). Na bongo, Petelo asundolaki nyonso pe alandaki Yesu na bomoi na ye mobimba. Yesu akutanaki na mwasi Mosamaliya na libulu ya mai pe ayebisaki ye masumu na ye asilà kosala. Maloba ma ye ya liboso ezalaki: “Misie, namoni ete ozali mosakoli” (Yoane 4:19). Bato misato oyo bautaki na bisika ekeseni, kasi bandimaki Yesu mbala moko, ntango Atalisaki likabo ya kososola makanisi.

Likabo yango elimwaki nde ntango lokasa ya suka ya Biblia ekomamaki? Soki bikamwa yango ekomami polele na Biblia, lelo oyo, ezali wapi? Na ntembe te, mosakoli ya eleko oyo akotatolama na nzela ya bikamwa.

Nzambe abosani nde bato na Ye? Azali naino na makoki ya kobikisa babeli? Azali naino kolobela biso na nzela ya basakoli na Ye? Moko na basakoli amonáká nde mokolo oyo?

**Masakoli mosusu mazali,
oyo ekokisami naino te?**

ELAKA YA MOSAKOLI NA MIKOLLO YA SUKA

Maloba ya suka mpenza, oyo ekomami na Kondimana ya Kala, epesi elaka oyo: **“Tala, nakotindela bino Eliya mosakoli, liboso na koya ya mokolo monene pe ya nsómo ya Yawe. Akozongisa mitema ya batata epai na bana, pe mitema ya bana epai na batata na bango, ete náyá pe nábeta mokili na ekweli mabe te.”** (Malaki 4:5-6)

Mokolo monene pe ya nsómo ya Nkolo ekomi naino te, boye tosengeli kozela mosakoli Eliya na motema mobimba. Na Biblia, basakoli bazalaki koya na ngámbo ya bibongiseli minene te. Bazalaki koya epai na bato moke oyo baponami. Kanísá naino soki mosakoli ya Malaki 4 ayaki, pe bato bazangaki koyamba ye. Ekozala boni soki azali lokola basakoli ya kala, pe bobele bato moke nde bandimi ye? Soki mosakoli yango asengeli koya lisusu na ntango na suka, tokoyeba ye ndenge nini? Eyano emonani polele na kati ya Makomi. Akozala na lolenge ya mosakoli. Akoyeba basekelé ya mitema. Akosala bikamwa. Bibongiseli bakoluka kosala ete bato bándimela ye te. Kasi bato moke, oyo baponámá, nde bakondima ete azali motindami oyo alakámákí mpo na lelo.

Tokoyeba ndenge nini ntango Eliya akoya lisusu? Akotalisa bilembo nini mpo tókoka kondima ye?

Eliya azalaki moto ya zamba. Bikamwa pe bilembo minene elandaki mosala na ye. Atelemelaki misala mabe ya eleko na ye na mateya na ye. Koleka mingi, atelemelaki makambo ya nsoni ya Mokonzi-mwasi Yezabele. Ntango Eliya akamatamaki na Likolo, na likálo ya móto, molimo na ye ekitaki likolo na Elisa.

Bikamwa ná bilembo minene pe emonanaki na mosala ya Elisa, atelemelaki pe masumu ya mokili na mateya na ye. Basakoli nyonso mibale, moko na moko atelemelaki bibongiseli ya eleko wana. Sima na mibu nkama na nkama, molimo yango eyaki lisusu na mokili, kati na Yoane Mobatisi. Mosakoli Malaki asakóláká ete Eliya akoya lisusu mpo na kotalisa Nkolo: *“Tala, nazali kotinda motindami na ngai, pe akobongisa nzela liboso na ngai...”* (Malaki 3:1). Yoane Mobatisi moto akokisaki yango, wana asengaki ete bana na Nzambe bábongola mitema. Lokola Eliya, atelemelaki mokonzi pe bibongiseli ya eleko na ye na mateya na ye. Nkolo Yesu atitolaki ete Yoane Mobatisi azalaki mosakoli ya Malaki 3 na Buku ya Matai (11:10): *“Mpo na ye nde ekomámá ete, Tala, nazali kotinda motindami na ngai liboso na yo, pe akobongisa nzela na yo liboso na yo.”* Luka 1:17 elobi ete molimo ya Eliya (Elias) esengelaki kozala kati na Yoane Mobatisi, *“Lisusu, akotambola liboso na ye na molimo pe na nguya ya Eliya, mpo na kozongisa mitema ya batata epai ya bana.”* Kasi tala ete eteni ya mibale ya Malaki 4 ekokisamaki naino te: *“...pe mitema ya bana epai ya batata na bango, ete náyá pe nábeta mokili na ekweli mabe te.”* Eteni yango ya Makomi ekokokisama liboso na Boyei ya Mibale ya Klisto.

Mibu nkóto mibale sima na Yoane Mobatisi, ntango ekoki lisusu mpo molimo ya Eliya éyá lisusu na mokili.

Mokolo yango ekomi! Na eleko oyo, tomoni molimo ya Eliya koya lisusu. Abeti ntembe na bibongiseli ya eleko oyo. Atelemeli masumu ya mokili. Atalisi bilembo pe bikamwa mingi mpenza. Atei Biblia, liloba moko sima na mosusu, bandá na Genese kino na Emoniseli. Mosakoli ya Malaki 4 ayei ndenge elakamaki, pe atei Nsango oyo euti na Ngwende ya Nzambe na-Nguya-nyonso. Nkombo ya mosakoli yango ezali **William Marrion Branham**. Tobengaka ye “Ndeko Branham”.

“William Branham, nalingaki ye pe nandimaki ete azali mosakoli ya Nzambe.” Oral Roberts, mopalanganisi-nsango-malamu oyo ayebani mokili mobimba pe mobandisi ya Université Oral Roberts.

“William Branham ayaki epai na biso lokola mosakoli ya Nzambe pe atalisaki biso, na ekeke ya ntúkú mibale, makambo ndenge moko mpenza na oyo tomonaki na Nsango Malamu... Nzambe ayaki kotala bato na Ye, mpo mosakoli monene atelemisamaki kati na biso.”

Dr. T.L. Osborn, mopalanganisi-nsango-malamu ya ba-Pantekotiste pe mokomi monene.

“Liboso ábondela mpo na moto, azalaki kolobela makambo mike-mike oyo etali bokono ya moto yango, pe lisusu makambo mike-mike ya bomoi na bango – engumba, mimbóngo, misala na bango – azalaki ata kozonga sima, mosika na bolenge na bango. Branham asalaki libunga ata mbala moko te na oyo etali liloba ya bwanya na mibu nyonso oyo nazalaki elongo na ye. Mpo na ngai, ezali makambo nkóto na nkóto.” Ern Baxter, mopalanganisi-nsango-malamu, mobongisi ya ba-campagne ya Branham kati na mibu nsambo, pe moko na bakambi ya ebandeli ya Mouvement ya Nouvelle Eglise Britanique.

Bandá na eleko Nkolo Yesu Klisto azalaki na mokili, moto moko te aningísá mokili na bozindo ya boye. Na ebandeli mpenza kati na mwa ndako ya mabaya, likolo na bangomba ya Kentucky, kino na Amarillo, na Texas, epai Nkolo azuaki ye mpo na kozongisa ye na Ndako, bomoi na ye ezalaki ntango nyonso na makambo ya kokamwa. Na bokambami ya Mwanje na Nkolo na 1946, mosala ya Ndeko Branham epelaki móto, pe ebandisaki eleko ya mayangani minene ya kolamuka pe ya kobikisa babeli, oyo epalanganaki na Amerika mobimba pe na mokili mobimba. Kino moi ya lelo, bakomeli mikanda ya Baklisto bandimá ye lokola “tata” pe “moto ya liboso” oyo asalaki mayangani minene ya kolamuka pe ya kobikisa babeli na mibu 1950, oyo ebongolaki Lingomba Pantekotiste pe, sukasuka, eyaki

kobota mouvement Charismatique, oyo lelo ezali kosala na bibongiseli nyonso, tóloba, ya ba-Protestant. Ata bongo, lokola momesano, bibongiseli balandaka malakisi na ye te pe baboyaka etíndá na ye.

Bisika nyonso azalaki kokende, Nzambe azalaki kotalisa polele ete Ndeko Branham azali mosakoli mpo na ekeke oyo. Lokola Yobo, Nkolo alobelaki ye na kati ya ekumbaki. Lokola Mose, Likonzi na Móto emonanaki pe ekambaki ye. Lokola Mika, atiolamaki na bakambi ya mangomba. Lokola Eliya, azalaki moto ya zamba. Lokola Yilimiya, atindamaki na Mwanje. Lokola Daniele, amonaki mamono ya makambo oyo ekoya sima. Lokola Nkolo Yesu, ayebacki basekelé ya mitema. Pe lokola Polo, abikisaki babeli.

Nkolo ayaki lisusu kotala bato na Ye na nzela ya mosakoli. Na ntango ya molili koleka na masolo ya kalakala, esika bomoto malamu ekweisami mingi mpenza pe mandóki mabomaka boike na bato mbala moko ebandi komonana, moto moko ya komikitisa atindamaki longwa na bozali ya Nzambe mpo na kobenga bato bazali kokufa kobongola mitema.

Moyekoli molingami Yoane akomaki na ntina na Nkolo Yesu:

Makambo mosusu pe ezali mingi, oyo Yesu asalaki, oyo, soki nyonso ekomamaki, nakanisi, ata mokili yango moko elingaki kozanga esika ya kotia mikanda oyo elingaki kokomama. Amen. (Yoane 21:25)

Tokoki pe koloba ndenge moko mpo na bomoi ya Ndeko Branham. Mateya koleka 1.200 etiámá na ba-bande pe ezali na masolo nkóto na nkóto ya bomoi ya moto malamu oyo. Kasi tozali kokoba koyoka matatoli ya sika ya misala ya bomoi na ye likolo na bomoi ya bamilió ya bato. Buku moke oyo ekoki kotalisa ata moke te ebele na mosala monene oyo moto na Nzambe yango asalaki na mokili.

EBANDELI

“Mokolo nabotamaki na mwa ndako ya mabaya, kuna, na Kentucky, Mwanje na Nkolo akotaki na lininísa pe atelemaki wana. Likonzi na Móto ezalaki wana.”

Pole ya ntongo ebandaki nde kobengana molili ya mokolo yango ya malili, na sanza ya minei. Lininísa bobele moko ya libaya efungwamaki mpo na kokotisa pole ya ntongo na mwa ndako yango moko ya mabaya. Ndeke moko, rouge-gorge, azalaki pembeni na lininísa yango, azalaki na esengo ya ndenge mosusu na ntongo wana, pe azalaki koyemba na makasi na ye nyonso. Na kati ya ndako, elenge mobali moko, Charles Branham, akotisaki maboko na salopéti na ye ya sika, pe azalaki kotala mwasi na ye ya mibu 15. “Tokopesa ye nkombo William,” elobaki tata na ye bongo.

Pole moko ya kokamwa ekotaki na lininísa. Pole yango etambolaki na ndako pe etelemaki likolo na mbeto, esika bebé autaki kobotama. Ezalaki bobele Pole yango oyo ebimisaki bana ya Baebele na Ezipito. Ezalaki bobele Pole yango oyo ekutanaki na Polo na nzela ya Damaseke. Pe Ekokobaki kokamba bebé yango mpo na kobenga Mwasi na libala ya Klisto ete ábima na mokili. Pole yango ezalaki eloko mosusu te bobele Mwanje na Nkolo, Likonzi na Móto; pe Eutaki lisusu komonana epai na moto.

Pe kuna na kati, na kati ya ndako moko yango ya mabaya, na ntongo ya le 6 avril, mobótisi afungolaki lininísa mpo pole ékota, pe Mama ná Papa bákoka komona ngai. Bongo, Pole ya monene, lokola kusé, ezalaki kobaluka-baluka ezalaki yango kokota na lininísa. Ebalukaki esika ngai nazalaki, pe ekitaki likolo ya mbeto. Ebele na bafándi ya ngomba bazalaki wana. Bazalaki kolela.



Esika William Branham abotámá, Burkesville, Kentucky.

Mwa ndako yango ezalaki na bangomba ya súdi ya Kentucky, pembeni na mwa engumba ya Burkesville. Ezalaki le 6 avril 1909. Bébé yango azalaki mwana ya liboso kati na bana zomi, oyo Charles ná Ella Branham babotaki.

Eumelaki ntango molai te, Mwanje na Nkolo akutanaki lisusu na elenge yango, William Branham.

Ntango azalaki mwana, Mwanje alobeláká ye liboso, koloba ete, na bomoi na ye, akofanda pembeni na engumba moko, na nkombo New Albany. Akotaki na ndako pe ayebisaki mama na ye likambo oyo esalemaki. Lokola mama nyonso, akanisaki mingi te likolo na likambo yango pe atindaki ye ákende kolala mpo na kokitisa ye motema. Sima na mibu mibale, libota na bango bakendeki kofanda na Jeffersonville, na Indiana, bobele ba-kilometre moke ekabolaki bango na engumba New Albany, na súdi ya Indiana.

Mwanje alobelaki lisusu elenge mosakoli yango na mibu elandaki. Ezalaki mokolo moko ya kimia na sanza ya libwa, moi ezalaki kongala na nkasa ya lángi ya motáné na eleko ya moi makasi. Mwana yango azalaki kotenga-tenga wana amemaki katíni mibale ya mai na nzela. Akangaki mokókóli ya lisangu na mosapi na ye ya lokolo, esika mpota ezalaki, mpo putulú ékota te. Afandaki mpo ápéma na nse ya nzete

monene ya peuplier. Mpisoli ya miso ezalaki kotanga wana azalaki kolela mpo na libaku mabe na ye: Banninga na ye bazalaki na esengo mpo bakendeki kolóbo mbisi, kasi ye atikalaki mpo na komemela papa na ye mai. Na mbala moko, mopepe ebandaki kobaluka na nzete yango likolo na ye. Apangusaki miso pe atelemaki. Ayokaki ndenge nkasa ezalaki kopepa na mopepe...kasi mopepe ezalaki ata moke te. Atómbolaki miso, pe pene na katikati ya nzete yango, eloko moko ezalaki kobalola nkasa ya kokauka.

Na mbala moko Mongongo moko elobaki: “Komela masanga te, komela makaya te pe koyeisa nzoto na yo mbindo na lolenge moko te, ozali na mosala ya kosala ntango okokóla.” Mwana mobali yango ya mibu nsambo abangaki, abwakaki ba-katíni na ye pe akimaki epai ya mama na ye.

Lokola mosakoli Samuele, Nzambe autaki lisusu kolobela mwana yango.

Sima na bapóso moke, azalaki kobeta lisano ya bíle ná leki na ye ya mobali. Amiyokaki ndenge mosusu. Abwakaki miso na ngámbo ya Ebale Ohio pe amonaki gbagba moko ya kitoko. Mibali zomi na motoba bakweaki pe bakufaki ntango gbagba yango ezalaki kotongama. Elenge mosakoli yango autaki komona emononeli na ye ya liboso. Ayebisaki mama na ye, pe mama akomelaki ye likambo yango. Na mibu elandaki, mibali 16 bakweaki pe bakufaki ntango gbagba ya 2ème Rue na Louisville, Kentucky, ezalaki kotongama likolo na Ebale Ohio.

Nkolo azalaki kotalisa ye mamono ya makambo ekosalema sima. Pe, lokola basakoli oyo bazaláká liboso na ye,

mamono yango ezangaki kokokisama te.

MIBU YA BOLENGE

Na bomoi na ye mobimba, Ndeko Branham azalaki na mposa makasi ya kozala na zamba. Ntango akómaki na mibu 18, alongwaki na Indiana pe akendeki kofanda na bangomba minene ya wésti. Aumelaki na Arizona te pe asengelaki kozonga.

Mokolo moko nazuaki mokano, namonaki nzela ya kokima mbéla yango. Nazalaki kokende na wésti mpo na kosala na férme moko. Moninga na ngai, Nzambe azali monene kuna, ndenge moko Azali monene bisika nyonso. Zuá mayele uta na makambo ngai nabikeli. Soki Abengi yo, yanola Ye.

Na ntongo moko, na sanza ya libwa ya 1927, nayebisaki mama ete nakokende mobembo ya camping na Tunnel Mill, ezali na ntáká ya kilometre ntúkú mibale na ndambo na Jeffersonville, epai tozalaki kofanda na eleko wana. Nasilaki kolengela mobembo mpo na kokende na Arizona elongo na baninga. Ntango Mama ayokaki lisusu nsango na ngai, nazalaki na Tunnel Mill te kasi na Phoenix, na Arizona, nazalaki kokima Nzambe ya Bolingo. Kobika na férme ezalaki malamuni mpenza na ntango moko, kasi eumelaki te pe ebebaki, lokola bisengo nyonso ya mokili. Kasi, Nkembo na Nzambe, tika náloba awa ete kobika elongo na Yesu ekómaka ntango nyonso kitoko koleka kasi ebébaka te. Yesu apesaka kimia ebongi be pe kobondisama ntango nyonso.

Mbala mingi nazalaki koyoka mopepe kopepa na banzete milai ya pin. Ezalaki lokola nazalaki koyoka Mongongo na Ye kobénga na mosika, na zamba, koloba: "Adama, ozali wapi?" Emonanaki lokola minzoto ezalaki pembeni mpenza, ete okoki kosimba yango na maboko na yo. Emonanaki lokola Nzambe azalaki mpenza pembeni.

Eloko mabe na etúká yango ezali banzela kati ya biliki. Soki omeki kobima na nzela, okobunga mpenza na pete. Mbala mingi baturíste bamonaka mwa bafolólo ya biliki pe babimaka na nzela ya monene mpo na kobuka yango. Batelenganaka kati ya biliki, babungaka pe mbala mosusu bakufaka na mposa ya mai. Ezali pe bongo na nzela ya Baklisto – Nzambe azali na nzela ya monene. Alobeli yango na Yisaya, mokapo ya 35. Ebengami “Nzela monene ya Bosantu.” Mbala mingi, mwa bisengo ya mokili ebimisaka bino na nzela ya monene. Pe, bobungisaka makambo bobikelaki na Nzambe. Kati na biliki, soki obungi, mbala mosusu ekósaka miso komona makambo. Mpo na bato bakufaka na mposa ya mai, ekósaka miso komona ebale to láki. Mbala mingi bato balandaka yango pe bamibwakaka kati na yango, na sima bakososola ete bazali kosukola kati na zélo ya móto. Mbala mosusu zabolo atalisaka bino eloko ye abengaka bisengo. Ezali bobele kokósa miso, ezali eloko ya solo te. Soki oyoki ye, okosutuka ete ozali bobele komibakisela mpasi likolo na motó na yo. Koyókelaka ye te, ndeko motángi. Ndimela Yesu oyo apesaka mai ya bomoi na baoyo bazali na nzala pe na mposa.

Mokolo moko nazuaki mokanda kouta na mboka, koloba na ngai ete moko na bandeko na ngai ya mobali azalaki kobela makasi. Ezalaki Edwar, oyo alandi ngai. Na ntembe te, namonaki yango lokola likambo ya makasi te, bongo nakanisaki ete akobika na ye. Kasi na mpokwa moko, sima na mwa mikolo, ntango nautaki na engumba, koleka na esika tozalaki kolia na férme, namonaki lokasa moko likolo na mesa. Nazuaki yango. Ekomamaki: “Bill, yaka na matiti ya bibwele ya nórdi. Ezali na ntina monene.” Sima na kotángi mokanda yango, ngai ná moninga na ngai, tokendeki esika

ýango. Moto ýa liboso nakutanaki na ýe, ezalaki mobateli-zamba moko, azalaki moto ýa Lone Star, pe azalaki kosala na férme ýango. Nkombo na ýe ezalaki Durfy, kasi tozalaki kobenga ýe "Pop." Azalaki na elongi ýa mawa ntango alobaki: "Petit Billy, nazali na nsango ýa mawa mpo na ýo." Na ntango ýango moko mobateli-zamba-mokonzi ayaki wana. Bayebisaki ngai ete telegráme moko eutaki koya, mpo na koyebisa ngai liwa ýa ndeko na ngai ýa mobali.

Moninga na ngai, na mwa ntango moke, nakokaki koningana te. Ezalaki liwa ýa liboso na libota na biso. Kasi nalingi koloba ete likambo ýa liboso nakanisaki, ezalaki soki amilengelaki mpo na liwa. Ntango nabalolaki elongi pe nabwakaki miso na etando ýa matiti oyo esilaki kokauka, mai ýa miso ekitaki na matáma na ngai. Nakanisaki lisusu ndenge tozaláká kosala makasi elongo, ntango tozaláká bana mike, pe ndenge tozaláká kobika na mpasi.

Tozalaki komema bilei moke mpenza na kelasi. Misapi ýa makolo ezalaki libanda ýa sapato, pe tosengelaki kolata bakazaka ýa kala, oyo bakangí epéngle na kingo mpo tozalaki na simísi te. Nakanisaki lisusu mokolo moko oyo Mama atielaki biso popcorn na katíni ýa moke mpo tólia na midi. Tozalaki kolia esika moko na bana mosusu te. Tozalaki na makoki ýa kosomba bilei bango bazalaki kosomba te. Tozalaki ntango nyonso komibenda kino na ngomba mpo tolia. Nakanisi lisusu mokolo tozalaki na popcorn, tokanisaki ezalaki bilei ýa lokumu. Bongo, mpo náýeba ete nazui ndambo ýa ngai, nabimaki liboso midi ébeta pe nazuaki loboko mobimba liboso ndeko na ngai ázua ndambo na ýe.

Bongo, natelemaki wana kotala ndenge moi esilaki kokausa matiti, nakanisaki makambo

nyonso wana pe namitunaki soki Nzambe amemaki ye na esika ya malamuni koleka. Na ntango yango, Nzambe abengaki ngai lisusu, kasi lokola momesano, nalukaki koboya yango.

Namilengelaki mpo nazonza epai na biso mpo na bokundami. Ntango Wa-lokumu McKinny ya Lingomba ya Port Fulton, azali mpenza lokola tata mpo na ngai, ntango azalaki koteya, alobaki: "Bato mosusu bakoki kozala awa, oyo bayebi Nzambe te, soki bazali, boyamba Ye sikawa." Oh nakangaki kiti na ngai makasi, Nzambe azalaki kosala lisusu. Ndeko motangi, soki Abengi yo, yanola Ye.

Nakobosana ata mokolo moko te ndenge Papa na Mama balalaki, sima na bokundami. Nazalaki na mposa ya kozonga na Westi, kasi Mama abondelaki ngai makasi mpenza mpo natikala, sukasuka nandimaki kotikala, soki nakokaki kozua mosala. Nokinoki nazuaki mosala na Kompani ya Letá, na Indiana.

Pene na mibu mibale na sima, ntango nazalaki komeka ba-kontére, na atelié ya ba-kontére, na Izini ya Gaz, na New Albany, gaz ebetaki ngai pe epesaki ngai bokono oyo esalaki bamposo mingi. Nakutanaki na minganga nyonso oyo nayebaki. Nazalaki kobika te. Nabelaki bokono ya aside na estomá, oyo eutaki na gaz yango. Bokono yango ezalaki ntango nyonso kokoma makasi. Bamemaki ngai epai ya ba-spesialiste na Louisville, Kentucky. Sukasuka balobaki ete ezalaki apendisite, pe balobaki ete basengelaki kopasola ngai. Nakokaki kondima yango te mpo nazalaki koyoka mpasi na mopanzi te. Minganga balobaki ete nzela mosusu ezalaki te, basengelaki kopasola ngai. Sukasuka nandimaki lipaso yango kasi nalobaki makasi

ete bátia ngai anestezí locale mpo námona ndenge bazali kosala lipaso yango.



Oh, nalingaki ete moto oyo ayebi Nzambe ázala pembeni na ngai. Nazalaki kondima libondeli kasi nayebaki kobondela te. Bongo, motei moko ya Première Eglise Baptiste akotaki elongo na ngai na ndako ya lipasó.

Ntango balongolaki ngai na mesa pe batii ngai na mbeto na ngai, nazalaki ntango nyonso kolemba

nzoto. Motema na ngai ekómaki kobeta malembe mpenza. Nayokaki kufa kokómela ngai. Péma na ngai ezalaki ntango nyonso kokóma mokuse. Nayebaki ete nakómaki na suka ya mobémbo na ngai. Oh, moninga, zelá mokolo okokóma wana, nde okokanisa makambo mingi oyo osálá. Nayebaki ete nameláká makaya te, masanga te, to nazaláká na mimesano ya mabe te, kasi nayebaki ete namilengelaki te mpo na kokutana na Nzambe na ngai.

Moninga na ngai, soki ozali bobele mondimi ya lingomba, ya malili, ntango okokóma na suka, okoyeba ete omilengeli te. Boye, soki yango nde nyonso oyebi mpo na Nzambe na ngai, nasengi na yo, kaka sikawa, ete ófukama pe ósenga na Yesu ete ápesa yo kobikela mbotama ya sika, ndenge Ayebisaki Nikodeme na Yoane mokapo ya 3, pe oh, bangonga ya esengo ekobeta. Nkombo na Ye ekumisama.

Molili ebandaki kokóma makasi na ndako yango ya lopitalo, lokola nde ezalaki kati ya zamba

monene. Nakokaki koyoka mopepe kopepa na nkasa, kasi ezalaki lokola mosika mpenza na zamba. Ntango mosusu osílá koyoka mopepe koningisa nkasa, kopusana moke-moke pene na yo. Namilobelaki: "Ee, oyo nde liwa ezali koya kozua ngai." Oh! Molimo na ngai esengelaki kokutana na Nzambe, namekaki kobondela kasi nakokaki te.

Koleka mopepe yango ezalaki koya, ezalaki koyokana makasi koleka. Nkasa ezalaki koningana, pe na mbala moko, nakendeki.

Ezalaki lokola nazongaki mwana moke na makolo ngulu, natelemaki bobele na nzela yango na nse ya nzete yango moko. Nayokaki Mongongo yango moko oyo elobáká: "Komela masanga to makaya ata moke te." Pe nkasa oyo nayokaki ezalaki yango moko oyo nayókáká na nzete yango mokolo wana.

Kasi mbala oyo, Mongongo elobaki: "Nabengaki yo kasi oboyaki kokende." Ezongelaki mbala ya misato.

Bongo nalobaki: "Nkolo, soki ezali Yo, pesa ngai nzela ete názonga na mokili, pe nakoteya Nsango Malamu na Yo uta na likolo ya bandako pe na matákanelo ya balabala. Nakolobela yango na moto nyonso!"

Ntango emononeli yango elekaki, namonaki ete natikala naino komiyoka malamumu ndenge wana te. Monganga oyo apasolaki ngai azalaki naino na lopitalo. Ayaki kotala ngai pe akamwaki. Kotala ye, azalaki lokola kokanisa ete nakokufa, bongo alobaki: "Nakendeke na ngai na losambo te, mpo mosala na ngai ezali monene mingi, kasi nayebe ete Nzambe auti kotala elenge mobali oyo." Mpo na nini alobaki bongo, nayebe te. Moto ata moko te abakisaki maloba na yango. Soki na

eleko wana naʔebaka makambo oʔo naʔebi lelo, nalingaki kokita na mbeto pe kogánga Lokumu na Nkombo na ʔe.

Sima na mwa mikolo, nazuaki ndingisa ʔa kozonga na ndako, kasi nazalaki kaka kobela pe nasengelaki kolata manéti na miso, mpo nazalaki komona malamumu tē. Motó na ngai ezalaki koningana soki naumeli kotala eloko moko.

Nakómaki mpenza koluka koʔeba Nzambe. Nakendeki na lingomba moko kino na lingomba mosusu, nazalaki koluka esika oʔo babéngaka bato na etumbelo na lolenge ʔa kala. Kasi mawa mingi, nakokaki komona ata moko tē.

Nalobaki ete soki esalemi ete nakómi Moklisto, nakozala mpenza ʔa solo. Motei moko ayokaki ngai koloba bongo, alobaki: "Sikawa, petí Billy, obandi kokóma fanatíki." Nalobaki ete soki esalemi ete nabongwani, nakolinga koʔoka ʔango ntango ekoʔa, lokola bayekoli.

Oh, Nkombo na ʔe ékumisama. Nabongwanaki, na sima, kino moi ʔa lelo, pe na lisungi na ʔe, nakobatela ʔango ntango nyonso.

Mokolo moko na butu, nazalaki na mposa makasi ʔa Nzambe pe kobikela ʔango mpenza, kino nakendeki na hangáre moko na sima ʔa ndako pe namekaki kobondela. Na ntango wana naʔebaki kobondela tē, pe nabandaki bobele kosolola na ʔe, ndenge nasololaka na bato mosusu. Na mbala moko Pole moko ekotaki na hangáre ʔango, esalaki ekulusu, pe Mongongo ebimaki na ekulusu ʔango, pe elobelaki ngai na lokóta oʔo nasosolaki tē. Na sima, elimwaki. Ebendaki bokebi na ngai. Ntango bomoto na ngai ezongaki, nabondelaki: "Nkolo, soki ezali ʔo, nasengi ete Óʔá kolobela ngai lisusu." Bandá mokolo nabimáká na lopitalo, nakómáká kotanga Biblia

na ngai, pe natángáká na 1 Yoane 4: "Balingami, bóndimaka milimo nyonso te, kasi bómekaka yango soki euti na Nzambe."

Nayebaki ete molimo moko ebimelaki ngai, pe wana nazalaki kobondela, eyaki lisusu. Bongo, mpo na ngai, ezalaki lokola balongoli ngai mokumba ya kiló nkama mitano na molimo na ngai. Natelemaki nokinoki pe nakimaki mbangu kino na ndako, pe ezalaki lokola nazalaki kokima mbangu na mipepe.

Mama atunaki ngai: "Bill, likambo nini ekómeli yo?" Nalobaki na ye: "Nayebi te, kasi nazali mpenza komiyoka malamumu pe pepele." Nakokaki lisusu kofanda na ndako ntango molai te. Nasengelaki kobima pe kokima mbangu.

Na ntango wana, nayebaki ete soki Nzambe alingi ete náteya, Akobikisa ngai. Bongo, nakendeki na losambo moko, bandimaka kopakola mafuta pe nabikaki mbala moko. Bongo, namonaki ete bayekoli bazalaki na eloko moko oyo batei mingi bazali na yango te lelo. Bayekoli babatisamaki na Molimo Mosantu, yango wana bakokaki kobikisa babeli pe kosala bikamwa minene na Nkombo na Ye. Boye, nakómaki kobondela mpo na libatisi ya Molimo Mosantu pe nazuaki yango.

Mokolo moko, sima na sanza soki motoba, Nzambe akokisaki mposa ya motema na ngai. Alobelaki ngai kati na Pole moko ya monene, Koloba na ngai ete nákende koteya pe kobondela mpo na babeli, pe Akobikisa bango, ata soki bazali na bokono nini. Nabandaki koteya pe kosala makambo Ye azalaki kotinda ngai kosala. Oh, moninga, nakoki te kobanda koyebisa yo makambo nyonso oyo esalémá: Bakufi miso bamóná. Bibósono batámólá. Bato babíká na kansére, pe bikamwa ya ndenge na ndenge esalémá.



Mokolo moko na ebandeli ya Balabala Spring, na Jeffersonville, Indiana, sima na póso mibale ya kolamuka, nazalaki kobatisa bato 130. Moi ezalaki makasi mokolo yango na sanza ya mwambe, pe bato soko 3000 bazalaki wana. Nalingaki kobatisa moto ya 17, mbala moko, nayokaki lisusu Mongongo yango ya bopolo, elobaki: "Tómbola miso na likolo." Likolo ezalaki lokola motáko, mokolo yango, moi makasi, na sanza ya mwambe. Mbula ebetáká te póso soko misato liboso na yango. Nayokaki lisusu Mongongo yango, pe, lisusu, na mbala ya misato, elobaki: "Tómbola miso na likolo."

Natombolaki miso na likolo, pe monzoto ya kongala moko ya monene ekitaki longwa na likolo, nasiláká komona yango mbala mingi liboso, kasi nazaláká koyebisa bino te. Mbala mingi nazalaki koyebisa bato ndenge ezalaki kokita, kasi bazalaki koseka pe koloba: "Bill, ozali bobele komona yango na makanisi. To, ntango mosusu ozalaki kolota." Kasi nkembo na Nzambe, mbala wana Amitalisaki polele na miso ya bato nyonso, mpo eyaki mpenza pembeni na ngai na lolenge ete nakokaki ata koloba te. Sima na ba-

sekónde, nagángaki pe bato mingi batómbolaki miso pe bamonaki mpenza monzoto yango likolo na ngai. Bamoko bakweaki sénza, bamosusu bazalaki kogánga pe bamosusu bakimaki. Na sima, monzoto yango ezongaki na likolo, pe esika yango eutaki ezalaki soko metre karé mitano, pe esika yango ezalaki kaka koningana pe kobaluka lokola mbonge ezali kobaluka. Lipatá moke ya pembe esalemaki na esika yango pe monzoto yango emataki pe ekotaki na lipatá yango.

Lokola Yoane Mobatisi, mosakoli atatolamaki kati na mai ya Libatisi.

Mamóno ekobaki. Banninga na ye ya mosala, bakambi ya mangomba, bazalaki koloba na ye ete mamóno na ye ezalaki kouta na Nzambe te. Bazalaki koloba na ye ete azalaki na molimo mabe. Likambo yango ezalaki kotungisa ye mingi. Akokaki lisusu komema mokumba yango te, bongo akendeki na zamba mpo na koluka Mokano ya Nzambe. Eutaki mpenza na bozindo ya motema na ye na lolenge ete alakaki ete akozonga te soki azui eyano te. Ezalaki kuna, na kati ya libulu moko ya nkaká, nde Mwanje na Nkolo apesaki ye etinda na ye. Libanda na makambo mosusu, Mwanje ayebisaki ye boye: “Soki osali ete bato bándimela yo, pe soki ozali na bosembo wana ozali kobondela, eloko ata moko te ekotelema liboso na mabondeli na yo, ata pe kansére te.”

Ntembe nyonso esilaki. Azuaki sikawa etinda pe akendeki liboso na mpiko nyonso. Kolamuka ya kobikisa babeli eutaki kobanda.

Bato nkóto nkama na nkama bazalaki na mayangani ya Branham. Bato nkóto na nkóto babikaki na bokono na Nkombo ya Nkolo Yesu Klisto. Ba-evanjeliste mosusu, ndakisa Oral Roberts, T.L. Osborn, ná A.A. Allen, balandaki Ndeko Branham nokinoki, pe babandaki ba-

kolamuka na bango ya kobikisa babeli. Nkolo asopaki mapamboli na Ye koleka, oyo bamónáká naino te. Loboko ya Yesu Klisto, oyo ebikisaka, esimbaki lisusu bato na Ye.

“Nalelaka mingi na esengo mpo na likabo oyo Nzambe, oyo auti kopesa na lingomba ya ndeko na biso molingami, William Branham, ná likabo na ye ya kokamwa, ya kobikisa babeli. Oyo ezali nde Nzambe moto azali kosala makambo mingi, koleka nyonso oyo tokoki kosenga to kokanisa (Baefese 3:20), mpamba te, namóná to natángá naino te likambo lokola mosala ya kobikisa babeli ya William Branham.”

Rev. F.F. Bosworth, evanjeliste oyo ayebani na mokili mobimba pe moko na batata oyo basálá ebongiseli ya ba-Assemblée de Dieu ná lingomba Pantekotiste ya lelo.

“Mokolo moko, tozalaki kotala ndenge azalaki kosolola na mobali moko oyo alalaki na mbeto. Liboso, eloko ata moko etalisaki te ete mobali yango azali kososola. Na sima, mwasi na ye, oyo azalaki pembeni na ye, alimbolaki ete mobali yango azalaki kobunda na liwa mpo na kansére, pe ete matoi na ye ekúfá, azalaki koyoka makambo oyo ezalaki kolobama te.

Bongo, Ndeko Branham alobaki ete esengeli liboso ete mobali yango áyoka mpo áyebisa ye makambo oyo etali kobikisama na ye na kansére. Abondelaki na ntango moko. Na mbala moko mobali yango abandi koyoka! Mpisoli ya monene etiolaki na matama ya mobali yango, oyo na mpokwa mobimba wana, elongi na ye ezalaki kotalisa ata elembo moko ya lisosoli to ya esengo te. Ayokaki na bokebi nyonso ntango asololaki na ye mpo na kobikisama na kansére.”

Rev. Gordon Lindsay, mokomi monene, motei, pe mobandisi ya Institut Christ Pour Les Nations.

“Ndeko Branham alobaki: ‘Moto ya Congrès abikisami.’ Motema na ngai ebetaki makasi. Napusanaki pe nandimaki Nkolo lokola Mobikisi ya nzoto na ngai. Nasundolaki nzete na ngai ya bibósono...pe Lola ekitaki!’

William D. Upshaw, Moto ya Congrès ya Amerika (1919-1927), alukaki ete bápona ye Prezidá ya Amerika na 1932. Ntango azalaki mwana moke, akweáká, mokongo na ye ebukanáká, pe akómáká ebosono. Azalaki na mibu 84 ntango abikisamaki na mobimba, na libondeli ya Ndeko Branham, sima na ye kozala ebósono mibu 66. Azalaki lisusu na bosenga ya veló to nzeta ya bibósono te sima na yango.

“Nazalaki na mbeto mibu mwambe ná sanza libwa mpo na bokono ya tiberkilóze, pe minganga bakokaki lisusu kosalisa ngai te. Nakokaki kokómisa kilo ntuku mibale na mitano te, pe elikia nyonso esilaki. Na sima, Rev. WM Branham ya Jeffersonville, na Indiana, ayaki, kokokana na emononeli oyo amonaki ya mwana mpate oyo akangamaki na zamba, pe azalaki kogánga ‘Milltown,’ ezali esika ngai nafandaka. Ndeko Branham akómáká naino awa te, to ayébáká naino moto moko ya awa te. Ntango ayaki, atielaki ngai maboko pe abondelaki, abelelaki Nkombo ya Nkolo pe molingami na biso Yesu likolo na ngai. Ezalaki lokola eloko moko ekangaki ngai, pe, na mbala moko, natelemaki, pe nazalaki kotónda Nzambe mpo na nguya na Ye ya kobikisa. Nazali sikawa mobeti piano na lingomba Batiste ya awa.”

Georgia Carter, Milltown, Indiana, abikisamaki na tiberkilóze oyo elingaki koboma ye na 1940, pe abelaki lisusu bokono yango ata mokolo moko te na bomoi na ye. Azali moko na bato nkóto ntúkú na ntúkú oyo babikisámá na nzela na mosala na ye ya koteya, pe oyo bazali kobikisama kino lelo.

LIKONZI NA MÓTO

Ndeko Branham alimbolaka mingi Likonzi na Móto oyo etatolaki mosala na ye ya koteya. Ezalaki wana ntango abotamaki, bato nkóto na nkóto bamonaki yango na libongo ya Ebale Ohio, pe emonani ete ezalaki kolanda ye bisika nyonso azalaki kokende. Na 1950 nde Nkolo apesaki ndangá oyo etalisaki polele, epai na bandimi pe bazangi kondima, ete Likonzi na Móto oyo ezalaki elongo na mosakoli.



Kowelana ezalaki makasi na mpokwa wana na Sam Houston Coliseum. Ndeko Branham asalisaki mayangani ya lobiko na nzoto pe ezalaki kopalangana na ekólo mobimba. Mapamboli ya Nkolo Yesu ezalaki kosopana lokola mbula likolo na bilanga ya masangu ya molimo. Kasi bilembo pe bikamwa yango, bato bazangaki kotóngá yango te. Ndenge ezalaka ntango nyonso, moyini atelemisaki bangúná. Mampinga nyonso mibale ekutanaki na Houston, na Texas, pe Mwanje na Nkolo, Ye moko, akitaki mpo na kobunda etumba.

Bato nkóto na nkóto basilaki koya mpo na kotatola bikamwa oyo ekoki kotángama te, oyo ezalaki kolanda moto na Nzambe oyo. Mokolo moko liboso, etóngá ya batei ya engumba yango babetaki mondenge na mosakoli, na masoló ya bowelani likolo na lobiko na nzoto kouta na Nzambe, kasi mondenge yango eyaki epai ya moninga ya mosala ya mosakoli, Reverá F.F. Bosworth. Bato na ntembe mingi, batalisamaki na motei moko ya lingomba Batiste ya engumba yango, andimaka lobiko na nzoto kouta na Nzambe ata moke te. Bakomi ya bazulunále bayokaki likambo yango, pe nokinoki bakomaki ete: *“Kazaka Ya*

Teoloji Ekopumboa Lelo Na 19h00 Na Sam Houston Coliseum.”

Moto na ntembe azuaki mokangi fotó ya solosolo na mosala, Ted Kipperman ya Douglas Studios, mpo ákanga bafotó na bowelani yango. Na mpokwa yango, bafotó ekangamaki elongo na Ndeko Bosworth oyo atelemaki na komikitisa, wana moto na ntembe azalaki kotelema lokola azali kobangisa bato; na ntango moko atiaki mosapi na elongi ya mobange oyo amikitísá.

Ntango bowelani ebandaki, Reverá Bosworth aumelaki te mpo na kotalisa polele ete Nzambe abikisaka bokono, ná bilembo ya Makomi, na sima, mpo motuna étikala te, asengaki na baoyo basílá kobikisama na bampasi na bango bátelema. Bato nkóto na nkóto batelemaki. Ntango baoyo basílá kobikisama bafandaki, atunaki soki baoyo Nzambe abikísá na bokono, oyo bazalaki na nzoto kolongonu pe basambelaka na ebongiseli ya moto yango bakoki kotelema. Bandimi ya lingomba nkama misato batelemaki mpo na kotalisa na lipambu mawa oyo Nkolo Yesu asilaki kotalisa bango.

Sikawa mondenge eutaki epai ya moto na ntembe. “Mobikisi ya Nzambe yango áyá awa. Ásala ekamwiseli.” Ndeko Bosworth atalisaki polele ete Mobikisi ya Nzambe azali bobele Yesu, kasi moto na ntembe akobaki kongala na loléndo. Sukasuka, Ndeko Bosworth abengisaki Ndeko Branham na etumbelo. Andimaki koya, wana bato bazalaki kogánga mpo na kopesa ye mpiko.

Mosakoli, atondisamaki na Molimo Mosantu pe ayanolaki boye:

Ngai nakoki kobikisa moto moko te. Yango nde eloko nalobaka. Ntango nazalaki bebé, nautaki kobotama na Etá ya Kentucky, ndenge mama na ngai molingami alobá na ngai, pe etatolami na bomoi na ngai, Pole moko ekotaki na mwa ndako yango, epai yango esalemaki, ezalaki na simá na nse te, ezalaki ata na lininísa te, bazalaki bobele na mwa eloko moko wana lokola lininísa, lokola mwa ekuke, pe bafungolaki yango na bangonga ya mitano ya ntongo, pe Pole yango ekotaki, na kozunguluka, ntango ntongo ezalaki



kotána. Bandá wana, Ezalaka elongo na ngai. Ezali Mwanje ya Nzambe. Akutanaki na ngai Ye moko eleki mwa mibu. Na bomoi na ngai mobimba, Ayebisaka ngai makambo ekokisamaka, pe nalobaka yango ndenge Ye alobelaka ngai. Pe nabeti mondenge na moto nyonso na bisika nyonso, ete ákende na engumba esika nakólá, to na esika mosusu nyonso, soki nasílá koloba likambo moko na Nkombo ya Nkolo, kozanga ete ékokisama ndenge elobamaki.

Sima na ye koloba maloba wana, Molimo Mosantu akitaki na etumbelo, pe mokangi fotó asepelaki ete akangaki fotó. Ndeko Branham alongwaki na etumbelo, sima na koloba maloba ya pete, kasi ya lisakoli oyo: *“Nzambe nde akotatola. Ngai nakoloba lisusu te.”*

Molandi ya M. Kipperman akendeki noki kosukola bafotó yango mpo na bansango ya ntongo ya mokolo oyo elandi. Amonaki eloko moko ya ndenge mosusu, ntango abimisaki fotó ya liboso na nkisi oyo esukolaka yango. Yango, ná bafotó mosusu mitano oyo elandaki, ezalaki na eloko te. Asimbaki motema pe akweaki, ntango abimisaki fotó ya suka na nkisi. Na fotó ya suka, Likonzi na Móto emonanaki polele likolo na motó ya mosakoli ya Nzambe, William Marrion Branham.

Bana ya Yisalele bamonaki Likonzi na Móto oyo ezalaki kokamba Mose, pe bato ya eleko oyo bamoni bobele Likonzi na Móto yango oyo ezali kokamba mosakoli mosusu.

Bapesaki fotó yango nokinoki epai ya George J. Lacy, Nganga Motali ya Mikanda oyo Etiami Ntembe ya U.S. F.B.I., pe andimaki fotó yango na likanisi na ye ya bonganga. Mokanda oyo M. Lacy akomaki ezali na lokasa oyo elandi.

Likambo yango esalemaki liboso ete ba-ordinatére ná bafotó nimeríke ézala, pe ekokaki kolimbolama te na lolenge mosusu oyo zebi eyebi, bobele ete Pole mpenza ezalaki likolo na motó ya William Branham. Lelo, fotó yango ezuami na Biblotéke ya Congres ya Etats-Unis, na mbokamokonzi ya ekólo, Washington DC.

George J. Lacy
Motali ya Mikanda oyo Etiami Ntembe
Shell Building
Houston, Texas

Mokolo mwa 29 na sanza ya yambo, mobu 1950

MALOPA PE MAKANISI

Ntina ya Likambo: Zábulu ya fotó oyo batieli ntembe

Mokolo mwa 28 na sanza ya yambo, mobu 1950 na bosenga ya Reverend Gordon Lindsay, oyo ayaki lokola ntoma ya Reverend William Branham ya Jeffersonville, Indiana, uta na ba-Studio Douglas, oyo ezuami na nimeró 1610 ya Balabala Rusk na engumba oyo, nayambaki zábulu ya fotó moko ya bonene ya pouce 4x5 [cm 10,16 x 12,70], oyo ezalaki na elili pe esilaki kosukolama. Elobamaki polele ete ba-Studio Douglas nde ekangaki Reverend William Branham fotó yango, na Stade Sam Houston, ntango ayaki na engumba na biso na suka ya sanza ya yambo na mobu 1950.

BOSENGA

Révérénd Lindsay asengaki ngai ete nájala zábulu ya fotó yango na nzela ya zébi. Asengaki ngai ete nápesa maloba ya suka, soko ekokoka, yengebene na komona na ngai, soko sima na kosukolama ya zábulu ya fotó, elili yango ebongisamaki to “ebongolamaki” na lolenge moko boye, oyo ekokaki kosala ete monkólótó ya pole émonana na lolenge ya libúngútulú likolo na motó ya Reverend Branham.

BOTALI

Natalaki pe nayekolaki na bokebi nyonso, na miso pe na mikroskópe, mobimba ya ngámbo nyonso mibale ya filme yango, oyo ezalaki ya Eastman Kodak Safety Film. Natalaki ngámbo nyonso mibale ya zábulu ya fotó yango na pole ultra-violé oyo eleki na ekongoleli pe nakangaki zábulu yango ba-fotó ya infra-rouge.

Botali na mikroskópe emonisaki ata na esika moko te ete zábulu yango ebongisamaki na lolenge moko boye, oyo bato basalelaka mpo na mombongo. Lisusu, boluki na mikroskópe emonisaki ata mwa mbeba moko te ya nkisi ya filme na kati to na nzinganzinga ya monkólótó ya pole yango.

Botali na nzela ya pole ultra-violé emonisaki ata eloko moko oyo euti libanda te, to mbano ya bosangisami ya nkisi te na ngámbo moko na moko ya zábulu yango, oyo ekokaki kosala ete monkólótó ya pole yango ébima sima na kosukolama ya zábulu yango.

Fotó ya infra-rouge pe etalisaki ata mwa eloko moko te oyo ekokaki kolakisa ete filme yango ebongisamaki.

Botali yango pe emonisaki ata mwa eloko moko te oyo ekokaki kotalisa ete zábulu yango ezalaki oyo basangisi-sangisi to oyo bakangi fotó mbala mibale.

Eloko moko te emonanaki kuna, oyo elingaki kotalisa ete monkólótó ya pole yango etiamaki na ntango ya kosukolama ya filme. Eloko moko pe emonanaki kuna te, oyo elingaki kotalisa ete esukolamaki na ndenge ya momeseno te, pe na ndenge oyo endimami te. Eloko moko ya kobakisa emonanaki kuna te, ntango nakokanisaki bokasi ya pole.

MAKANISI

Uta na botali pe boyekoli oyo touti kolobela, nandimi solo ete zábulu oyo eleki na botali ndenge na ndenge, ebongisamaki te, esangisami-sangisami te, to pe ekangami fotó mbala mibale te.

Lisusu, nandimi solo ete monkólótó ya pole oyo emonani likolo na motó, na lolenge ya libúngútulú, esalemaki na pole oyo ebetaki zábulu ya fotó.

Ezongisami na limemia nyonso,



GJL/11

MABOMBAMI EMONISAMI

Na ebandeli ya mosala ya Ndeko Branham, ekómaki polele ete lolenge ya bibongiseli esalemaki mpo na kotómbola bibongiseli ya mangomba, kasi Nsango Malamu ya solo te. Ndeko Branham azalaki kondima Liloba na liloba ya Biblia, pe azalaki kobeta ntembe na yango te, ata soki baninga ya mosala, baninga, to libota basengelaki koboya ye.

Ntango azalaki naino mondimi ya Lingomba Baptiste Missionnaire, bayebisaki ye ete ábúlisa basi na mosala ya koteya. Kasi, ayebaki Makomi malamumpenza. I Timoté 2:12 elobi polele ete: *“Nazali kopesa mwasi nzela ya koteya te, to ya kozala na bokonzi likolo na mobali te, kasi nde áfanda kimia,”* pe I Bakolinti 14:34 elobi: *“Basi báfanda kimia na balosambo, mpo bapesi bango nzela ya koloba te...”* Yango etelemelaki basi te, kasi Biblia elobeli likambo yango polele. Ntango motindo epesamaki, akokaki kokakola te, boye abimaki na lingomba yango.

Bobele Likomi wana te nde bibongiseli bazalaki kotia yango pembeni. Nkolo amonisaki bosolo ya libatisi epai ya Ndeko Branham. Ndenge nini Yesu apesaki mitindo ete: *“Yango wana, bókende pe bókómisa bato bayekoli na bikólo nyonso, bóbatisa bango na nkombo ya Tata, pe ya Mwana, pe ya Molimo Mosantu,”* nzokande libatisi nyonso oyo ekomami na Biblia epesamaki na Nkombo na Yesu? Ntoma Petelo apesaki mitindo, na Misala 2:38, ete ***bóbongola mitema, pe moko na moko na bino ábatisama na Nkombo na Yesu Klisto.*** Makomi etambolaka na bomoko mpenza, kasi esengelaki na mosakoli moko mpo na komonisa sekelé oyo: “Tata” ezali nkombo te, “Mwana” ezali nkombo te, pe “Molimo Mosantu” ezali nkombo te. Bobele ndenge moto moko azalaka tata ya bana na ye, mwana ya baboti na ye,

pe ndeko ya bandeko na ye, kasi nkombo na ye ezali “tata”, “mwana” to “ndeko” te. Tata, Mwana, pe Molimo Mosantu ezali bibiangelo ya Nkombo na Yesu Klisto. Matai 28:19 ná Misala 2:38 elandani malamú mpenza.

Ata lisumu ya ebandeli na Elanga ya Edene emonisamaki, ezalaki likambo ya kolia mbuma te, kasi likambo moko makasi koleka. Ndenge nini kolia eteni ya mbuma ekokaki komonisa mbala moko na Adama ná Eva ete bazalaki bolumbu? Ekoki kososolama ata moke te. Boyokani nini ezali kati na mbuma ya póme ná kozala bolumbu? Mosakoli ya Nzambe amonisaki sekelé yango polele.

Banje oyo elobelami bango na Emoniseli mokapo ya 2 pe ya 3 ezalaki banani? Mbala mosusu bankombo na bango ekoki koyebana malamú.

Babuti mpunda oyo bayebani te ya Emoniseli mokapo ya 6 ezali banani? Bazali na eloko moko ya motuya mpenza oyo ezali kolandana.

Mboka Etats-Unis elobelami nde na Buku ya Emoniseli?

Bato 144.000 oyo babikisamaki na mokapo ya 7 ezali banani?

Mwasi ya ndumba monene ya mokapo ya 17 ezali nani? Oyo ye azali pe basekelé nyonso oyo emonisamaki na Nsango ya mosakoli ya nguya oyo atindami na Nzambe.

Bobele bikamwa ebele nde elandaki moto te, kasi mabombami oyo ebombamáka na Biblia kati na bileko, emonisamaki pe na mosala na ye ya koteya. Ekómaki polele ete mosakoli yango akokisaki Makomi mingi koleka oyo ya Malaki 4.

Emoniseli 10:7: Kasi na mikolo ya mongongo ya mwanje na nsambo, ntango akobanda koyula kelelo, libombami ya Nzambe ekokokisama mpenza, lokola asakolaki na baombo na ye basakoli.

Mongongo moko ezali kogánga na mokili ete bato bábima na bibongiseli pe bázonga na Liloba na Nzambe ya ebandeli. Moko na moko na biso azui libaku malamumu moko, oyo Petelo, Yakobo ná Yoane bazuaki. Tozui libaku malamumu ya kotángama kati na bato moke oyo Nzambe aponá, oyo bakondimela bibongiseli ya mangomba ya lelo te.

Makomi Mosantu elobeli bomoi pe misala ya bato oyo batambolaki elongo na Nzambe, pe bapakolamaki mpenza na Molimo na Ye, kino balobaki YANGO ELOBI NKOLO, pe maloba na bango etatolamaki na bilembo pe bikamwa oyo ekweaka te. Bazalaki basakoli ya Nzambe, pe Mongongo ya Nzambe mpo na eleko na bango.

Ntango ya lelo ekeseni nde na ntango oyo Yesu azalaki awa? Bakambi ya mangomba nde babakaki Ye na ekulusu. Bayekoli bazalaki moke mingi mpenza kati ya mimesano minene ya mangomba. Baboyamaki, batiolamaki, pe bamosusu babomamaki mpo batelemelaki mimesano ya bibongiseli. Mbala mosusu biso tokobomama lelo te mpo na kondima na biso, kasi na ntembe te tozali konyokwama. Lokola Bafalisai ná Basadukai, bakoki koboya te bikamwa oyo elandaki mosala ya koteya ya Ndeko Branham, boye bazali kobundisa yango na lolenge mosusu. Bokoki koyoka bango koloba ete azalaki mosakoli ya lokuta, mokambi ya binzambinzambi, to ya mabe koleka. Nzokande, azalaki moto na Nzambe ya komikitisa, oyo atelemelaki makasi mpenza bokonzi na nko ya bibongiseli pe mangomba likolo na bato ya Nzambe. Babundisaki Yesu ndenge moko ntango Atelemelaki biyambweli pe mimesano na bango.

Nzambe asepelaki na mokano malamumu ya Ndeko Branham ndenge andimaki Liloba moko moko ya Biblia,

pe Azali kosalela mosala na ye mpo na komema bamilió ya milimo ya bato epai na Yesu Klisto. Lelo, Mongongo ya Mwanje na Nsambo ezali koyula na makasi na Yango nyonso. Na mokili mobimba, pene na milió mibale na bato bandimá Nsango ya Ndeko Branham. Ekoki kozala mwa bato moke mpenza kati na ba-miliáre mibale na bato bamibengaka Baklisto, kasi na eleko nini bato ya Nzambe bazalaki moke te?

Tozali na babande ya mateya koleka 1.200 oyo ezali na Mongongo oyo esakolamáki, na Emoniseli 10:7, ete ekoya. Mateya yango moko na moko efungolaka mabombami mingi ya Nzambe. Okoki koyoka Mongongo yango soki olingi koyoka Yango.

YO MOTO OKOPONA

Ata mbala moko te natéyaka bato liteya mpo bato bálanda ngai to bákota na losambo na ngai, to bábanda bondeko pe ebongiseli moko. Nasálá naino yango te, pe nakosala yango sikawa te. Nasepelaka na makambo wana te, nasepelaka nde na makambo ya Nzambe pe bato, pe nakosepela soki nakoki kosala likambo yango moko. Likambo yango ezali ete námona boyokani mpenza ya molimo kati na Nzambe pe bato, oyo kati na yango bato bakoki kokóma bikelamu ya sika kati na Klisto, batondi na Molimo na Ye, pe bazali kobika kokokana na Liloba na Ye. Nakosenga, nakobondela pe nakokebisa bino nyonso ete bokoyóka Mongongo na Ye sikawa, ete bopesa Ye bomoi na bino mobimba, ndenge nandimi na motema na ngai ete napésá Ye nyonso ya ngai. Nzambe ápambola bino, pe Boyei na Ye ésepelisa motema na bino.

Rev. William Marrion Branham

BISIKA EKOMAMI

YESU KLISTO AZALI NZAMBE (BONZAMBE)

ESODE 20:3	Okozala na banzambe mosusu liboso na ngai te.
YISAYA 9:6	Mpo mwana abotameli biso, mwana mobali apesameli biso; bokonzi ekozala na lipeka na ye, pe bakobenga ye Mopesi-Toli Monene, Nzambe na Nguya, Tata ya Seko, Nkolo ya Kimia.
MATAI 1:23	Tala, mongondo akozua zemi, akobota mwana mobali, pe bakopesa ye nkombo Emanuele, elingi koloba, Nzambe elongo na biso.
YOANE 1:1	Na ebandeli Liloba azalaki, pe Liloba azalaki elongo na Nzambe, pe Liloba azalaki Nzambe.
YOANE 1:14	Pe Liloba akomaki nzoto, pe afandaki elongo na biso, (pe tomonaki nkembo na ye, nkembo lokola oyo ya mwana na likinda ya Tata,) atondaki na boboto pe na solo.
YOANE 4:24	Nzambe azali Molimo, pe baoyo basambelaka ye basengeli kosambela ye na molimo pe na solo.
YOANE 5:43	Nayei na nkombo ya Tata na ngai, kasi bozali koyamba ngai te; soki moto mosusu ayei na nkombo na ye moko, mbele boyambaki ye.
YOANE 8:19	Bongo balobaki na ye ete, Wapi Tata na yo? Yesu ayanolaki ete, Boyebi ngai te, boyebi pe Tata na ngai te. Soki boyebaki ngai, mbele boyebi pe Tata na ngai.
YOANE 10:30	Ngai ná Tata tozali moko.
YOANE 12:45	Pe ye oyo amoni ngai amoni oyo atindi ngai.
YOANE 14:8-9	Filipe alobi na ye, Nkolo, lakisa biso Tata, pe ekoki mpo na biso. Yesu alobi na ye, Naumeli na bino mingi boye, pe atako bongo, yo Filipe oyebi ngai kaka te? Ye oyo amoni ngai amoni Tata. Ndenge nini olobi ete, Lakisa biso Tata?
YOANE 20:28	Pe Tomá azongisi monoko pe alobi na ye ete, Nkolo na ngai pe Nzambe na ngai.
MISALA 2:36	Na yango, tika ndako mobimba ya Yisalaele éyeba malamu ete Nzambe akómisi ye Nkolo pe Klisto, Yesu yango, oyo bino bobakaki na ekulusu.
MISALA 9:4-5	Pe akweaki na nse pe ayokaki mongongo moko elobi na ye ete, Saulo, Saulo, mpo na nini ozali konyokola ngai? Ye alobaki ete, Yo nani, Nkolo? Alobaki ete, Ngai Yesu oyo ozali konyokola. Ezali mpasi mpo óbeta nzube.
BAEFESE 4:5	Nkolo moko, kondima moko, libatisi moko,
BAKOLOSE 1:13-17	Asikoli biso na nguya ya molili, pe akotisi biso na bokonzi ya Mwana na ye ya bolingo, oyo na nzela na ye, biso tosikolami na makila na ye, tozui bolimbisi ya masumu na biso. Ye azali elilingi ya Nzambe oyo amonanaka te, mwana ya liboso na biloko nyonso oyo ezalisámá; mpamba te, na nzela na ye biloko nyonso ezalisamaki na likolo pe na nse, biloko oyo emonanaka pe biloko oyo emonanaka te, ézala bakiti ya bokonzi, to bonkolo, to mikolo, to nguya. Biloko nyonso ezalisamaki na nzela na ye pe mpo na ye. Lisusu ye azali liboso ya biloko nyonso, pe na nzela na ye biloko nyonso ezali eloko moko.

BAKOLOSE 2:6-9	Na yango, lokola boyambi Klisto Yesu Nkolo, bótambola kati na ye: Bópika misisa pe bótongama kati na ye, pe bótelema ngwi na kondima, ndenge boteyamaki, wana bozali kotonda na matondi. Bókeba ete moto moko te ábebisa bino na nzela na filozofi pe na bokosi ya mpamba, kolanda mimesano ya bato, makambo mikemike ya mokili, kasi Klisto te. Mpo litondi mobimba ya Bonzambe efandi kati na nzoto na ye.
BAEBELE 13:8	Yesu Klisto azali ndenge moko lobi, lelo, pe libela.
I YOANE 5:7	Mpamba te biloko misato ezali kopesa litatoli na likolo: Tata, Liloba pe Molimo Mosantu: pe yango nyonso misato ezali eloko moko.
EMONISELI 1:8	Ngai nazali Alifa pe Omega, ebandeli pe suka, Nkolo alobi bongo, ye oyo azali, pe azalaki, pe azali koya, Oyo-na-nguya-nyonso.

LIBATISI NA MAI

MATAI 28:19	Yango wana, bókende pe bókómisa bato bayekoli na bikólo nyonso, bóbatisa bango na nkombo ya Tata, pe ya Mwana, pe ya Molimo Mosantu:
MALAKO 16:16	Ye oyo akondima pe akobatisama akobikisama; kasi ye oyo akondima te akokweisama.
MISALA 2:38	Petelo alobi na bango ete, Bóbongola mitema, pe moko na moko na bino ábatisama na nkombo na Yesu Klisto mpo na bolimbisi ya masumu na bino, pe bokoza likabo ya Molimo Mosantu.
MISALA 4:12	Lobiko pe ezali na moto mosusu te, mpo nkombo mosusu ezali te na nse ya lola, oyo epesami na kati ya bato, oyo tosengeli kobika na nzela na yango.
MISALA 8:12	Kasi ntango bandimaki Filipe, oyo azalaki kosakola nsango malamú ya bokonzi ya Nzambe pe ya nkombo na Yesu Klisto, babandaki kobatisama, mibali ná basi.
MISALA 19:3-5	Pe alobaki na bango, Boye, bozuaki libatisi nini? Balobaki ete, Libatisi ya Yoane. Polo alobaki ete, Yoane abatisaki na libatisi ya kobongola motema, azalaki koyebisa bato ete bándimela moto oyo azalaki koya sima na ye, elingi koloba, Klisto Yesu. Ntango bayokaki bongo, babatisamaki na nkombo ya Nkolo Yesu.
BAEFESE 4:5	Nkolo moko, kondima moko, libatisi moko
BAKOLOSE 3:17	Pe nyonso oyo bokosala na maloba to na misala, bósala nyonso na nkombo ya Nkolo Yesu, bópezá Nzambe Tata matondi na nzela na ye.

BISIKA EKOMAMI

BASAKOLI

MITUYA 12:6	Pe alobaki, Boyoka maloba na ngai sikawa. Soki mosakoli moko azali na kati na bino, ngai YAWÉ nakomimonisa na ye na emononeli, pe nakosolola na ye na ndoto.
DUTELONOME 18:21-22	Pe soki olobi na motema na yo, Ndenge nini tokoyeba liloba oyo NZAMBE alobi te? Ntango mosakoli alobi na nkombo na YAWÉ, soki likambo yango esalemi te, to ekokisami te, yango ezali likambo oyo YAWÉ alobaki te, kasi mosakoli alobaki yango na lofundo. Osengeli kobanga ye te.
I NTANGO 16:20-22	Pe bazalaki kotambola longwa na ekólo moko kino na ekólo mosusu, pe longwa na bokonzi moko kino na libota mosusu, andimaki te ete moto ányokola bango, kasi apamelaki bakonzi mpo na bango, Alobaki, Bómama bapakolami na ngai te, pe bósala basakoli na ngai mabe te.
NZEMBO 105:12-15	Ntango batikalaki bato moke; ee, moke mpenza, pe bapaya kuna. Ntango bazalaki kotambola longwa na ekólo moko kino na ekólo mosusu, longwa na bokonzi moko kino na libota mosusu, andimaki te ete moto ányokola bango, kasi apamelaki bakonzi mpo na bango, Alobaki, Bómama bapakolami na ngai te, pe bósala basakoli na ngai mabe te.
AMOS 3:7	Mpo Nkolo NZAMBE akosala eloko moko te, kozanga ete ámonisa sekelé na ye epai na basali na ye basakoli.
MALAKI 4:5	Tala, nakotindela bino Eliya mosakoli liboso na koya ya mokolo monene pe ya nsómo ya YAWÉ:
LUKA 1:70	Ndenge alobaki na monoko ya basakoli na ye basantu, bandá mokili ebandá:
LUKA 24:25	Bongo alobaki na bango, Bino bozángá lisosoli, pe mitema na bino endimaka noki te nyonso oyo basakoli balobá:
MISALA 7:52	Nani bankoko na bino banyokolaki te na kati ya basakoli? babomaki baoyo basakolaki liboso boyei ya Moyengebene, oyo bino bokómi sikawa bateki pe babomi na ye:
MISALA 24:14	Kasi nakotatola yango liboso na yo ete nasambelaka Nzambe ya bankoko na ngai na nzela oyo babengi lipengwa, nandimaka makambo nyonso oyo ekomámá kati na mibeko pe na basakoli:
BAEFESE 2:20	Pe botongami likolo ya moboko ya bantoma pe basakoli, Yesu Klisto ye moko azali libanga ya litumu.
BAEBELE 1:1-2	Nzambe, oyo na ntango ya kala pe na ndenge ebele, asololaki na bankoko na biso na nzela na basakoli, na mikolo oyo ya suka, asololi na biso na nzela na Mwana na ye, oyo atii ye mosangoli ya libula ya biloko nyonso, pe na nzela na ye, asalaki mikili;

BIKAMWA/LOBIKO NA NZOTO KOUTA NA NZAMBE

DUTELONOME 26:8	Pe Yawe abimisaki biso na Ezipito na loboko ya nguya, pe na loboko oyo esembolami, pe na makambo minene ya nsomo, pe na bilembo, pe na bikamwa.
BASAMBISI 6:13	Gideone alobaki na ye, E Nkolo na ngai, soki Yawe azali na biso, bongo mpo na nini makambo nyonso oyo ekómeli biso? pe wapi bikamwa na ye nyonso, oyo bankoko na biso bayebisaki biso, ete, Yawe nde abimisaki biso na Ezipito te? kasi sikawa Yawe asundoli biso, pe akabi biso na maboko ya Midiane.
NZEMBO 103:3	Ye moto alimbisaka libunga na yo mobimba, abikisaka yo na maláli nyonso.
YISAYA 53:5	Kasi azokisamaki mpo na masumu na biso, atutamaki mpo na mabe na biso: etumbu mpo na kimia na biso ezalaki likolo na ye; pe na mapipi na ye, biso tobikisámá.
DANIELE 11:32	Pe baoyo bazali kosalela kondimana yango mabe, akomema bango na lipengwi na maloba sukali. Kasi bato oyo bayebi mpenza Nzambe na bango bakozala na makasi, pe bakosala makambo ya minene.
MALAKO 16:17-18	Bilembo oyo ekozala na baoyo bakondima; Na nkombo na ngai, bakobengana milimo mabe; bakoloba minoko na sika, bakolokota banyoka; soki bameli eloko moko ebomaka, ekosala bango mabe soki moke te, bakotiela babeli maboko pe bakobika.
YOANE 14:12	Solo, solo, nazali koloba na bino, Ye oyo akondimela ngai, misala oyo nazali kosala, ye pe akosala yango; akosala misala ya minene koleka oyo; mpo ete nazali kokende epai na Tata.
MISALA 19:12	Bazalaki komemela babeli miswále ná biteni ya bilamba oyo emamaki nzoto na ye, pe maláli ezalaki kotika bango, pe milimo mabe ezalaki kobima.
I BATESAL. 1:5	Mpo nsango malamumu oyo tozali kosakola eyaki epai na bino kaka na maloba te, kasi pe na nguya, pe na Molimo Mosantu, pe na kondima makasi; ndenge boyebi motindo ya bato biso tokómaki epai na bino mpo na bolamu na bino.
YAKOBO 2:18	Nzoka nde, moto akoki koloba, Yo ozali na kondima, pe ngai nazali na misala. Lakisa ngai kondima na yo oyo ezangi misala, pe ngai nakolakisa yo kondima na ngai na nzela na misala na ngai.
YAKOBO 2:20	Kasi olingi nde koyeba, Ee moto mpamba, ete kondima oyo ezangi misala ezali ya kokufa.
YAKOBO 5:14-15	Moko na bino azali na bokono? ábenga bampaka ya lingomba, pe bábondela mpo na ye, bápakola ye mafuta na nkombo ya Nkolo. Pe libondeli ya kondima ekobikisa mobeli, pe Nkolo akotelemisa ye. Pe soki asalaki masumu, ekolimbisamela ye.
YAKOBO 5:16	Bóyambolaka masumu na bino moto na moninga na ye, pe bóbondelaka moto na moninga na ye, mpo bóbikisamaka. Libondeli ya moyengebene epesaka mbano monene.
I PETELO 2:24	Ye moko amemaki masumu na biso na nzoto na ye mpenza likolo na nzete, mpo tótika masumu, pe tózala na bomoi ya boyengebene: Bobiki na mapipi na ye.

BISIKA EKOMAMI

(MOLIMO YA ELIYA)

II MIKONZI 2:15	Ntango bana ya basakoli oyo bazalaki na Yeriko bamonaki ye na mosika, balobaki, Molimo ya Eliya ekiti likolo na Elisa. Pe bayaki kokutana na ye, pe bagumbamaki liboso na ye kino na nse.
YISAYA 40:3-4	Mongongo ya moto oyo azali kogánga na biliki, Bóbongisa nzela ya YAWÉ, kati na esika ekaúká, bósembola balabala monene mpo na Nzambe na biso. Lobwaku nyonso ekotombwama, pe ngomba nyonso, ya monene pe ya moke, ekokitisama. Esika ya matutú-matutú ekosembolama, pe esika ya mabúlú-mabúlú ekobongisama alima.
MALAKI 3:1	Tala, nazali kotinda motindami na ngai, pe akobongisa nzela liboso na ngai. Pe Nkolo oyo bozali kozela akoya pwasa na Tempelo na ye, motindami ya kondimana, oyo bozali kosepela na ye, tala, akoya. YAWÉ na bibeke alobi bongo.
MALAKI 4:5-6	Tala, nakotindela bino Eliya mosakoli liboso na koya ya mokolo monene pe ya nsomo ya YAWÉ. Akozongisa mitema ya batata epai na bana, pe mitema ya bana epai na batata na bango, ete naya pe nabeta mokili na ekweli mabe te.
MATAI 11:10 (Malako 1:2, Luka 7:27)	Mpo na ye nde ekomámá ete, Tala, nazali kotinda motindami na ngai liboso na yo, pe akobongisa nzela na yo liboso na yo.
MATAI 11:14	Pe soki bolingi kondima yango, ye nde Eliya oyo asengelaki koya.
MATAI 17:11-12	Yesu ayanolaki ete, Ya solo, Eliya azali koya pe akobongisa makambo nyonso. Kasi nazali koloba na bino ete Eliya asilá koya pe bayebaki ye te, kasi basalaki ye makambo oyo balingaki. Ndenge moko pe Mwana na moto asengeli komona mpasi na maboko na bango.
LUKA 1:17	Lisusu, akotambola liboso na ye na molimo pe na nguya ya Eliya, mpo na kozongisa mitema ya batata epai na bana, pe bato oyo bazanga botosi na epai ya mayele ya bayengebene, mpo na kobongisela Nkolo bato oyo babongisami.
LUKA 3:4 (Matai 3:3, Malako 1:3, Yoane 1:23)	Ndenge ekomámá na buku ya maloba ya Yisaya mosakoli ete, Mongongo ya moto azali kogánga na esobe, Bóbongisa nzela ya Nkolo, bósembola banzela na ye.

Soki olingi koyeba makambo mosusu etali
mosala ya Wa-lokumu William Marrion
Branham pe ndenge okoki kozua mateya na ye,
okoki kokomela:

www.themessage.com

to pe

Voice Of God Recordings
13e rue Limete No. 82, Quartier Industriel
Kinshasa / Limete, Dem Rep of Congo
243.810.34.24.67
www.branham.org

www.themessage.com

LINGALA
